



KENYATAAN MEDIA

MOU RAPATKAN KERJASAMA PERTANIAN DENGAN AUSTRALIA

1. Timbalan Menteri Pertanian dan Industri Asas Tani, YB Dato' Sri Haji Tajuddin bin Abdul Rahman telah menandatangani Memorandum Persefahaman (MoU) bidang pertanian antara Kerajaan Malaysia dan Kerajaan Australia pada 3 Julai 2017 di Rome, Itali. Kerajaan Australia pula diwakili oleh Menteri Pertanian dan Sumber Air merangkap Timbalan Perdana Menteri, Hon. Barnaby Joyce.
2. Dato' Sri Tajuddin berada di Rome untuk menghadiri Persidangan Food and Agriculture Organization of the United Nations (FAO) ke-40 dari 3 hingga 8 Julai 2017.
3. MoU yang dimeterai ini akan memperbaharui kerjasama yang telah ditandatangani oleh Malaysia dan Australia pada 8 Mac 2006 bagi memantapkan lagi hubungan antara kedua-dua negara dalam bidang pertanian di samping menyediakan platform utama perbincangan dua hala dalam membincangkan kerjasama semasa serta potensi kerjasama baharu dalam bidang pertanian dan perhutanan.
4. Kerjasama ini akan turut menjadi landasan bagi meneruskan program-program Malaysia-Australia Agricultural Cooperation Working Group (MAACWG) yang telah terdahulu diwujudkan.
5. Menurut YB Dato' Sri Tajuddin, "Selain berupaya mengeratkan lagi hubungan antara kedua-dua negara, MoU ini akan memberi ruang dan peluang kepada Malaysia untuk mempertingkatkan lagi kapasiti industri tanaman, ternakan, perhutanan, perikanan dan akuakultur yang seterusnya dapat menyokong transformasi sektor pertanian Malaysia. Australia adalah sebuah negara yang mempunyai industri pertanian disegani, terutamanya menerusi penggunaan teknologi yang canggih, produktiviti yang lebih maju ke hadapan serta daya saing yang tinggi."
6. Antara inisiatif dua hala yang telah dilancarkan adalah pembinaan kapasiti (capacity building) dalam kepakaran Animal Disease Emergency Response, di mana Australia pada masa ini diiktiraf di peringkat antarabangsa kerana mempunyai industri ternakan yang bebas daripada wabak penyakit ternakan.
7. Sesi pertukaran pengetahuan ini dipercayai mampu meningkatkan lagi keupayaan industri ternakan Malaysia agar terus dipercayai, berdaya saing dan menyumbang kepada sekuriti makanan negara.

8. Selain itu, hubungan kerjasama lebih erat yang terjalin ini juga dijangka akan membuka pasaran lebih luas kepada produk-produk pertanian Malaysia, lebih-lebih lagi melalui Dasar Kerajaan Australia yang menggalakkan perdagangan produk-produk pertanian. Galakan ini memberi impak secara langsung kepada peningkatan pendapatan peladang-peladang, menggalakkn inovasi bagi memastikan pengeluaran produk pertanian yang mampan dan berterusan serta dengan pengurusan logistik yang efisien.
9. Untuk rekod, perdagangan sektor agromakanan antara kedua-dua negara pada 2016 adalah bernilai RM4.947 bilion. Import dari Australia ke Malaysia bernilai RM3.57 bilion, terdiri terutamanya daripada produk bijirin, daging, tenusu dan haiwan hidup. Eksport dari Malaysia ke Australia pula bernilai RM1.377 bilion, termasuk makanan proses, makanan laut serta kopi, teh dan rempah.

KEMENTERIAN PERTANIAN DAN INDUSTRI ASAS TANI
4 JULAI 2017

#####

Sebarang pertanyaan, sila hubungi:

Mohd Asril Idris
Ketua Komunikasi Korporat
Kementerian Pertanian dan Industri Asas Tani
asril@moa.gov.my , 013-3448185